

21/01/2002

KOAM sedia terima hukuman

Lukman Salleh

KESATUAN Olahraga Amatur Malaysia (KOAM) sudah bersedia menghadapi apa jua tindakan yang bakal diumumkan Pesuruhjaya Sukan berhubung statusnya selaku badan sukan olahraga negara.

Majlis KOAM sudah menggerakkan jenteranya untuk bertindak segera serta pantas terhadap notis atau surat tunjuk sebab daripada Pesuruhjaya Sukan mengenai tindakan terhadapnya - yang dijangka diumumkan, hari ini.

Jelas sekali, KOAM tidak akan mudah menyerah, sebaliknya tampak akan mempertahankan hak dan kedudukannya selaku badan induk olahraga yang sah.

"KOAM menjangkakan akan menerima notis atau surat tunjuk sebab daripada Pesuruhjaya Sukan mengenai tindakan yang bakal dikenakan ke atas kami," kata Presidennya, Datuk Syed Mohamad Aidid Syed Murtaza, semalam.

Menurutnya, Majlis Khas KOAM yang bermesyuarat kelmarin memutuskan sebaik mereka menerima surat tunjuk sebab daripada Pesuruhjaya Sukan, KOAM akan mengadakan perjumpaan majlis serta merta untuk membincangkan tindakan susulan.

"KOAM bersedia untuk berdepan dengan sebarang bentuk kemungkinan yang bakal berlaku esok," kata Syed Aidid.

Hari ini, Pesuruhjaya Sukan, Datuk Mahamad Zabri Min dijangka mengumumkan tindakan yang akan dikenakan terhadap KOAM, hasil daripada cadangan Pasukan Petugas Khas yang dibentuk Kementerian Belia dan Sukan untuk membetulkan keadaan olahraga negara.

Di bawah Fasal 20 (2) Akta Pembangunan Sukan 1997, Pesuruhjaya Sukan sebelum membatalkan atau menggantung pendaftaran badan sukan di bawah subsekyen 20 (1), Pesuruhjaya hendaklah memberi badan sukan itu peluang untuk mengemukakan sebab, jika ada, menentang pembatalan atau penggantungan yang dicadangkan itu.

Mengenai memorandum kepada Perdana Menteri, Syed Aidid berkata terpulang kepada apa jua tanggapan ramai mengenai tindakan Majlis KOAM itu, sama ada menganggapnya sebagai satu tindakan yang lemah atau sebaliknya.

"KOAM tidak boleh menutup tanggapan orang lain. Majlis KOAM sudah putuskan untuk menghantar petisyen kepada Perdana Menteri meminta agar Datuk Seri Dr Mahathir Mohamad mempertimbangkan mengenai keputusan Pesuruhjaya Sukan untuk membatalkan atau menggantung pendaftaran kami.

"Sama ada keputusan ini sesuai atau satu tindakan yang lemah, terpulang kepada tanggapan masing-masing," katanya.

Hakikatnya, keputusan Majlis KOAM untuk menghantar memorandum kepada Perdana Menteri untuk membawa kepada pengetahuan mengenai masalah remeh olahraga - yang sepatutnya diselesaikan badan induk itu sendiri, agak memalukan.

Masih banyak ruang dan peluang untuk KOAM membuat rayuan dan tindakan menghantar memorandum kepada Perdana Menteri, bukanlah salah satu daripadanya. Dalam Akta Pembangunan Sukan 1997 sendiri ada peringkat penyelesaiannya.

Mungkin itu yang perlu digunakan KOAM ataupun mereka sepatutnya bersifat matang dengan mencari jalan penyelesaian sendiri bukan mengelak ataupun mengadu pada orang lain.

Mungkin dengan cara itu mereka akan lebih dihormati dan bukannya terus diperlekeh dan dipersendakan.

(END)